

ntsiag thiab tsoos laus yuav tsum xa rov qab nrog tus ntxhais rau niam tais yawm txiv.

2. Yog tus tub thiab tus ntxhais ua neej tsis tau ua ke, es nkawv hos sib nrauj, tsis hais niam nrauj lost xiv nrauj niam li, lub ncauj tsiag ces xuam mus li. Xam hais tias:

- a. Nkawv ob leeg siv tag lawm.
- b. Muab faib thaum sib faib cuab yig lawm.

(Amended 08/01/2019)

TSHOOJ II – FEEM V: TIAM TUB TSHOOB TUB KOS

Tub tshoob tub kos yog mej koob, phij laj, niam tais ntsuab, txiv cob txheeb, dab laug coob txheeb, nus tij nus npaws, tub tshaj phaj tub laub caw thiab niam txiv tus nres tshoob nres kos. Ib rooj tshoob, yog tsis muaj cov nod, tshoob yuav tsis tsheej tshoob, kos los yuav tsis tsheej kos. Yog li, thaum tshoob kos xaus lawd, yuav tau ua lawv tsaug, nco lawv tus txiaj ntsim.

Hais txog kev tiام tub tshoob tub kos, ib rab teb kuj muaj ib tsa txuj. Tab sis Hmoob 18 Xeem thov kom Hmoob yoog raws li lub txhooj tshoob txhooj kos uas Hmoob 18 Xeem tau teeb tseg, yog leej twg siv 18 Xeem lub txhooj los xaus tshoob xaus kos.

TSHOOJ III: HMOOB KAB TSHOOB KEV KOS

Raws li Hmoob 18 Xeem tau tshawb fawb thiab txheeb tau hais tias peb haiv Hmoob txoj kab tshoob kev kos muaj ntawm. Tab sis muaj qee hom tshoob, Hmoob tsis tshua phwb. Feem tshoob kos uas Hmoob feem coob phwb niaj hnub no yog me tshoob – tshoob tog qws xwb. Hmoob 18 Xeem tau txheeb hais tias tshoob kos, Hmoob muaj 6 hom, hom tshoob

loj mus txog hom tshoob me, raws li muab teev los hauv qab no:

01. Tshoob qhib roog tuam ntsa
02. Tshoob nkauj pom nraug qab, nraug pom nkauj Lw.
03. Tshoob poj ntsuam
04. Tshoob poj nrauj
05. Tshoob nkauj thim/Tshoob nkauj xa
06. Tshoob zij, Tshoob tuav, Tshoob qhaib, thiab tshoob xa.

TSHOOJ III – FEEM I: TSHOOB QHIB ROOG TUAM NTSA (TSHOOB PHWB)

Hom tshoob no yog hom tshoob kos uas Hmoob tsis tshua phwb heev. Yog luag muaj ib tug ntxhais zoo uas koj nyiam heev. Koj xav tau los ua poj ua sev, tab sis tus ntxhais ho tsis nyiam koj, los sis tus ntxhais ntawd niam thiab txiv xav kom koj mus nqis tsev hais ua ntsej ua muag rau tej niam txiv neej nus. Tub tshoob tub kos yuav tau nrog koj mus hais tom niam txiv neej nus tsev, ua tshoob ua kos, ua noj ua haus tag mam coj tau tus ntxhais los vaj los tsev. Rooj tshooj no yog tshoob qhib roog tuam ntsa.

FI-01. Raws li Hmoob 18 Xeem tau tshawb fawb pom tau hais tias txoj kab tshoob kev kos ntawm kev qhib roog tuam ntsa no kuj muaj teeb meem cov nyom thiab ua rau peb tsoom Hmoob sawv daws muaj kev txhawj xeeb, vim tsoom thawj coj tsis tau los muab peb tsoom Hmoob txoj kab tshoob kev kos nyob rau teb chaws United States of America los txhim kho rau peb tsoom Hmoob sawv daws coj, ua tus choj rau peb taug thiab ua txoj kev rau peb mus.

FI-02. Hmoob 18 Xeem thiaj li tau los zaum ua ke thiab tawm tswv yim los muab txoj kab tshoob kev kos, tshoob qhib roog tuam ntsa, tshoob phwb, no coj los ua ib lub txhooj kom ruaj